

**VENDIM**  
**Nr. 221, datë 7.5.2015**

**PËR DHËNIEN E MANDATIT TË DEPUTETIT TË KUVENDIT, KANDIDATIT TË LISTËS SHUMEMËRORE TË PARTISË DEMOKRATIKE NË QARKUN ELBASAN, PËR PLOTËSIMIN E VAKANCËS SË NJOFTUAR NGA KUVENDI I SHQIPËRISË**

Komisioni Qendror i Zgjedhjeve, në mbledhjen e datës 7.5.2015, me pjesëmarrjen e:

|           |           |                 |
|-----------|-----------|-----------------|
| Lefterije | Luzi      | kryetare        |
| Denar     | Biba      | zëvendëskryetar |
| Edlira    | Jorgaqi   | anëtare         |
| Gëzim     | Veleshnja | anëtar          |
| Hysen     | Osmanaj   | anëtar          |
| Klement   | Zguri     | anëtar          |
| Vera      | Shtjefni  | anëtare,        |

shqyrtoi çështjen me:

OBJEKT: Për dhënien e mandatit të deputetit të Kuvendit, kandidatit të listës shumemërore të Partisë Demokratike, në qarkun Elbasan, për plotësimin e vakancës së njoftuar nga Kuvendi i Shqipërisë, pas heqjes dorë nga mandati i deputetit të z. Ardjan Turku.

BAZA LIGJORE: Neni 23, pika 1, germa “a”, neni 175, pika 2, neni 164, pika 2, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar.

KQZ-ja, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

**VËREN:**

Për shkak të heqjes dorë nga mandati i deputetit të Kuvendit të Shqipërisë, të z. Ardjan Turku, deputet i zonës zgjedhore, qarku Elbasan, KQZ-ja, në zbatim të nenit 164, të Kodit Zgjedhor, merr vendim për dhënien e mandatit kandidatit të radhës në listën shumemërore të së njëjtës parti politike, në zonën zgjedhore përkatëse, regjistruar sipas nenit 67 të Kodit Zgjedhor.

Kolegji Zgjedhor, me vendimin nr. 36, datë 2.8.2013, ka shpërndarë mandatet dhe ka përcaktuar kandidatët fitues për zonën zgjedhore, qarku Elbasan, në zgjedhjet për Kuvendin, të vitit 2013. Sipas vendimit të sipërcituar, Partia Demokratike, për zonën zgjedhore, qarku Elbasan, për zgjedhjet për Kuvendin e Shqipërisë, të datës 23 qershor 2013, ka fituar 4 mandate.

Sipas vendimit të mësipërm, lista shumemërore e Partisë Demokratike për qarkun Elbasan, e miratuar nga KQZ-ja, kandidati me numër rendor 4 është z. Luçiano Boçi.

Rezulton se lista shumemërore e Partisë Demokratike në qarkun e Elbasanit, nuk i plotëson të gjitha kriteret e përcaktuara në nenin 67 të Kodit Zgjedhor dhe, konkretisht, nuk plotëson kriterin e gjinisë, duke mos pasur një në tre emrat e parë kandidatë nga secila gjini. KQZ-ja, me vendimin nr. 340, datë 11.5.2013, vendosi sanksionin administrativ gjobë, në masën 4 milionë lekë ndaj Partisë Demokratike. Në bazë të nenit 175, pika 2, të Kodit Zgjedhor, KQZ-ja, në rast vakance të krijuar në mandatet e fituara nga lista shumemërore e PD-së, në zonën zgjedhore, qarku Elbasan, duhet të zbatonte dhe sanksionin plotësues, duke zëvendësuar vakancën e krijuar me kandidatin e radhës nga gjinia më pak e përfaqësuar.

KQZ-ja, me vendimin nr. 340, datë 11.5.2013, “Për miratimin e listave shumemërore të Partisë Demokratike, pjesëtare e koalicionit “Aleanca për Punësim, Mirëqenie dhe Integritet”, për zgjedhjet për Kuvendin e Shqipërisë 2013”, ka miratuar listën shumemërore të Partisë Demokratike për 12 zonat zgjedhore, së bashku me deklaratat model 03, për vendet sipas kuotës gjinore të listës shumemërore për çdo zonë zgjedhore.

Sipas nenit 175, pika 2, të Kodit Zgjedhor, vakanca do të plotësohet nga kandidatja e parë në listë

që i përket gjinisë femërore. Sipas deklaratës model 03 “Deklarim për vendet sipas kuotës gjinore të listës shumemërore” të depozituar nga PD-ja në dokumentacionin e listës shumemërore të zonës zgjedhore, qarku Elbasan, rezulton se kandidatja e parë në listë sipas deklaramit është kandidatja me nr. rendor 6 (gjashtë) znj. Arbjola Fadil Halimi.

Për sa më sipër, mandati i ndërprerë i përket kandidates me numër rendor 6 (gjashtë) znj. Arbjola Fadil Halimi, të listës së Partisë Demokratike në Zonën Zgjedhore, qarku Elbasan.

#### PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa “a”, nenin 164, pika 2, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar,

#### VENDOSI:

T’i japë mandatin e deputetit të Kuvendit të Republikës së Shqipërisë, kandidatit të radhës në listën shumemërore të Partisë Demokratike, qarku Elbasan, znj. Arbjola Fadil Halimi.

Ky vendim hyn në fuqi menjëherë dhe botohet në Fletoren Zyrtare.

Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 30 (tridhjetë) ditëve nga shpallja e këtij vendimi.